

Abdias

Imaginá ku bo stat ta rondoná pa un ehersito enemigu kruel. Morto sigur ta wardábo. Ma un anochi bo logra skapa den e skuridat. Bo ta hui bai na un lugá leu for di e enemigu. Ma diripiente, den skuridat, un persona desconosí ta atakabo, maltratabo, i hibábo bèk na e enemigu, i ta serábo. Ora di dia habri, bo por mira ken tabata asina mal hende. Bo konosé. Ta bo primo!

E storia ei no ta un fábulá. Esei *ta* mas òf ménos loke a sosodé! Nos lo mira e storia aki den nos estudio di e buki mas kortiku den Tèstqamènt Bieu, Abdias. E buki aki ta kontené solamente ún kapitùlo.

I. OUTOR DI E BUKI

A. NÒMBER DI OUTOR

Abdias tabata un di e nòmbernan mas komún di era di Tèsstamènt Bieu. Por lo menos diesdos diferente persona den Beibel tabatin e nòmber Abdias òf Obadías.

Abdias ta nifiká sirbidó òf adoradó di Jehová. Ta remarkable ku buki di Abdias ta reflehá aktitut di un sirbidó den algun sintido. Por ehèmpel, e antepasadonan di un sirbidó no ta importante. Abdias no a duna su geneologia. Un sirbidó no ta konta di su eksperensianan, loke Abdias tampoko a hasi. E profeta Abdias tabata interesá pa ku un kos so, i esei tabata pa e komuniká *e mensahe di Dios!*

B. BIDA DI OUTOR

- Fuera di su nòmber (1:1), e outor ta duna ningun otro informashon tokante su persona. Nos sa nèt nada tokante e outor: ken e tabata, unda el a biba, su ministerio, èts. (Tres otro profeta a hasi meskos: Habakuk, Hageo, i Malakias.)

Un tradishon hudiu ta identifiká Abdias komo e mayordomo di rei Akab (1 Reinan 18:3-16). Ma no tin evidensia pa proba esaki.

- For di kontenido di e buki por dedusí ku probablemente Abdias tabata un habitante di Juda.

- Abdias su mensahe tabata dirigí na un nashon pagano ku tabatin bastante kontakto ku Juda i Israel durante nan historia: Edòm. Edòm tabata un nashon enemigu di Juda. E buki aki ta denunsiá e edomitanan.

II. TRASFONDO PA KU E BUKI

Pa yuda nos komprendé Abdias su mensahe mihó ta importante pa nos sa algu tokante e edomitanan:

A. HISTORIA DI E EDMITANAN

For di nan infansia Jakòb ku Esau no tabata masha bon ku otro. Di bèrdat, siendo ohochi, nan asta a bringa ku otro den barika di nan mama (Génesis 25:22). De todo kaso, Esau a nase promé.

Ora nan a bira mas grandi, Esau a bende su derecho di primogenito ku Jakòb pa un tiki sòpi (Génesis 25:29-34). Segun nan kustumber, e primogenito mester ta líder spiritual di e famia—nan saserdote, esun ku tin kontakto ku Dios. Dor di bende su derecho di primogenito Esau a komuniká, “Pa mi, sopi ta mas importante ku mi relashon ku Dios!” I na un otro okashon, Jakòb a gaña Esau pa haña e bendishon di su tata (Génesis 27). Esaki si tabata algu ku Esau a deseá. Komo resultado di loke Jakòb a logra ku su engaño Esau a deseá pa mat’ é (27:41). Jakòb a hui pa Haran pa mas òf ménos dos dékada. Durante e tempu aki el a kasa i a haña basta yu.

Ora Jakòb tabata regresá for di Haran, Esau a bai top’ é ku 400 hòMBER (Génesis 32,33). Kiko tabata Esau su intenshon ku e akshon aki? Tabata pa spanta Jakòb, pa impreshon’ é òf pa mata Jakòb—pero Dios a par’ é? Beibel no ta indiká kiko Esau su motivashon tabata.

E desendientenan di Esau tabata yamá edomitanan. Nan a destruí e horeonan ku tabata biba den e serunan di Seir (Deuteronomio 2:12) i a habitá e serunan ei (Génesis 36:8-9) ku a ekstendé for di Laman Morto (òf Laman Salu) te na Golfo di Akaba.

Ora Israel, desendientenan di Jakòb, a haña nan libertat for di esklabitud na Egipto, nan a yega den serkania di e edomitanan. Nan a hasi petishon kortes pa dor di nan teritorio pa yega na e tera ku Dios a primintí nan. Ma e edomitanan no solamente a rechasá nan petishon. Nan asta a menasá di bringa kontra nan (Numbernan 20:14-21).

Di bèrdat e edomitanan a bringa ku Israel durante reinado di Saul (1 Samuel 14:47). Tambe tabatin guera entre e edomitanan i Israel durante reinado di David i Salomon (2 Samuel 8:14; 1 Reinan 11:14-25). Tabatin diferente bataya entre Juda i Edòm despues (2 Reinan 14:7; 2 Krónikanan 28:17).

Poko despues (talbes solamente sinku aña) ku Nabukodonosor a konkistá Juda i su kapital, Jerusalèm (586 B.C.), el a konkistá e edomitanan. Un tribu arabir, e nabateanan a saka e edomitanan for di e serunan di Seir i nan kapital, Petra. E edomitanan bai biba den e desierto sùit di Juda. Historia ta bisa ku esaki a sosodé durante reino di Dario I (521-485 B.C.). Malakias 1:3-5 ta duna impreshon ku den su era (435 B.C.) reino di e edomitanan ya kaba a wòrdu ruiná i nan a wòrdu saká for di nan tera.

E hudiu Judas Makabeo a kore ku e edomitanan na aña 164 B.C. Algun aña despues, Juan Hirkano a obligá nan pa bira hudiu (135-105 B.C.). El a obligá nan pa warda lei i wòrdu sirkunsidá.

B. KAPITAL DI E EDOMITANAN

Den pasado Sela tabata kapital di e nashon edomita. E ta mensioná den Huesnan 1:36; 2 Reinan 14:7; Isaias 16:1; 42:11. Probabelmente Sela ta nòmber di sitio ku despues a karga e nòmber, Petra.

Petra ta lokalísá 80 kilometer sùit di Laman Morto. Pa yega na siudat di Petra, bo tin ku kamna den un kibrá den barankanan mas ku 200 meter haltu i 1 pa 2 kilometer largu. E barankanan ta hopi serka otro, i komo resultado tabata kasi impusíbel pa un ehersito enemigu konkistá e siudat...dor ku e sòldánan lo mester kamna den un fila. Fásilmente por a defendé e siudat di Petra, asta ku poko sòldá so. E tabata un stat asina sigur ku Egipto, Babilonia i Asiria a warda nan tesoronan ei!

E siudat mes tabata lokalísá den un plénchi habrí meimei di e serunan 1,6 kilometer largu i 1,2 kilometer hanchu. Hopi di e edifisionan di Petra tabata konstruí dor di kòrta den e barankanan. Petra tabata un stat komersial, pasobra un ruta di karavana a pasa einan.

Talbes Abdias a dirigí su palabranan spesífikamente kontra Petra (p.e. 1:3)

Esaki ta duna un bista di e edomitanan. Nos no sa ki evento presis a okashoná skirbimentu di buki di Abdias!

III. LEKTORNAN DI E BUKI

E buki di Abdias klaramente ta dirigí kontra (i talbes *pa*) e edomitanan. Ma talbes e buki no a wòrdu skirbí pa e edomitanan lesa originalmente. Probabelmente e tabata skirbí pa benefisio di pueblo di Dios (1:17-21).

Mas profeta tabatin profesianan kontra Edòm: Isaias (21:11-12; 34:5-17), Jeremias (49:7-22), Ezekiel (25:12-14; 35:1-15), Malakias (1:2-4). Ku frekuensia nan ta mustra riba Edòm su piká di orguyo.

IV. FECHA DI E BUKI

E buki di Abdias ta esun mas kortiku di Tèstament Bieu, i esun mas difísil pa establese un fecha p'é. Tur klase di fecha ta propone pa buki di Abdias entre 850 pa 400 B.C. Asta entre studiantenan evangéliko tin bastante diferensia di opinion.

Abdias a mensioná plùndermentu di Jerusalèm (1:11-14). Ki tempu esaki a sosodé? Esei ta difísil pa determiná ku siguridat pasobra Jerusalèm a wòrdu di plùnder na vários okashon:

1. Dor di Sisak, rei di Egipto (925 B.C.) - 1 Reinan 14:25-26; 2 Krónikanan 12
2. Dor di e filisteonan i arabirnan durante reino di Joram (\pm 850-825 B.C.) - 2 Krónikanan 21:8-17; Amos 1:6,11-12
3. Dor di Joas, rei di Israel (\pm 790 B.C.) - 2 Reinan 14:13-14; 2 Krónikanan 25:23-24
4. Dor di Nabukodonosor – e rei aki a plunder Jerusalèm tres biaha:
 - a. 605 B.C. – Daniel 1:1-6
 - b. 597 B.C. – 2 Reinan 24:10-16
 - c. 587-586 B.C. – 2 Reinan 25; 2 Krónikanan 36; Jeremias 39,52

Nos no tin idea na kua biaha Abdias ta referí. Personalmente nos ta len den direkshon di e perspektiva ku Abdias ta papia di e invashon i plùndermentu #2...dor di e filisteonan i arabirnan. Pusíbelmente e edomitanan a koperá ku e filisteonan i arabirnan den e invashon aki (Amos 1:11-12). *Ma simpelmente no ta pusíbel pa sa sigur.*

Si esaki ta e kaso, Abdias lo a wòrdu skirbí entre añanan 840 i 825 B.C. Esei lo nifiká ku Abdias ta un di e promé profetanan pa skirbi...den era di Joel.

Un otro pusíbel indikashon di e fecha ta e echu ku tin hopi similaridat entre Abdias 1:1b-6 i Jeremias 49:14-16. Algun studiante di Beibel ta kere ku Jeremias a kopia loke Abdias a skirbi. Si esei ta e kaso, Abdias lo mester a wòrdu skirbí promé ku buki di Jeremias, i pues kasi sigur e plùndermentu di Jerusalèm lo no referí na e invashon di Nabukodonosor. Ma no ta pusíbel pa yega na un desishon konklusivo ku Jeremias a kopia loke Abdias a skirbi. Pues, tòg tin e pusibilidad ku e buki di Abdias a wòrdu skirbí nèt despues di kaída di Jerusalèm (586 B.C.).

V. PROPOSITO PA E BUKI

Nota algun pusíbel motibu ku Abdias a skirbi su buki:

- Pa avisá Edòm ku Dios Su huisio ta bin pronto pa motibu di nan orguyo i krueldat kontra Juda. Edòm a yega na e punto ku no tabatin skapatorio pa nan mas. Komo resultado, Edòm ta e úniko bisiña di Israel ku Dios no a duna un promesa di misericòrdia.
- Pa laga Juda sa ku Dios ta hustu i lo kastigá Edòm.
- Pa laga pueblo di Dios sa ku E lo destruí Edòm i establese Juda.

VI. STRUKTURA I KONTENIDO DI E BUKI

E skema di Abdias ta típiko di otro bukinan profétiko. E ta habri denunsiando piká, lagando sa ku huisio ta na kaminda. Anto e ta klousurá ku profesianan di speransa pa futuro pa pueblo di Dios

I. PROFESIA DI KASTIGU DI EDOM - 1:1-9

Tempu Abdias a skirbi su buki, Edòm tabata un tera asina sigur ku hende lo a hari su profesia! Edòm tabata orguyoso i arogante—especialmente Petra. Talbes Abdias a skirbi spesífikamente di Petra. E edomitanan tabata asina orguyoso ku nan a kere ku nan no tin

mester di Dios!

Ma *Dios*—no kualke ken ku ta—a bisa ku Edòm lo wòrdu destruí (1:3-4).

Ta notabel ku ora Abdias a skirbi e buki, lo tabata muchu mas lógiko pa profetisá ku Juda lo desparesé na lugá di Edom. Ma tòg ta nèt lo kontrario. E edomitanan a ser eliminá i hudiunan te ainda ta eksistí!

1:7 ta profetisá ku esnan ku ken e edomitanan tabatin aliansa lo vense nan. Historia ta konta kiko a sosodé. Entre 848-841 B.C. Edòm a djoin ku e filisteonan i *arabirnan* pa bringa kontra Juda i konkist'é. Na 586 B.C. Edòm a yuda Nabukodonosor mata hudiunan i destrui Jerusalèm. Algun aña despues Nabukodonosor a kibra su aliansa ku Edòm i a vense nan. I na aña 312 B.C. *un tribu Arabir* yama nabateanan a ekspulsá e edomitanan for di Seru Seir. Presis loke Dios a bisa a sosodé!

Pa ki motibunan Dios a kastigá Edòm?

1. Motibu general. Dios ta kastigá enemigunan di Su puebel. Génesis 12:3 ta bisa, "...esun ku maldishonábo, lo Mi maldishoná..." Pa síglonan, Edòm a oponé kontra puebel di Dios!

2. Motibu spesífiko. Abdias a mensioná algun motibu mas eksakto ku Dios a kastigá Edòm den e siguiente sekshon.

II. MOTIBU PA KASTIGU DI EDOM - 1:10-14

Abdias a kondená Edòm pa un piká spesífiko: *e piká di violensia—krueldat* (1:10).

Algun aña pasa un barku a wòrdu sekuestra pa e grupo di terorista, OLP. Mundu a keda babuká ku e krueldat di e teroristanan ora nan intenshonalmente a mata un hòmber paralisá, sintá den ròstul. Ta horíbel pa mata un hòmber bon di salú. Ma ta inkomprensi- belmente kruel pa mata un persona hèndikèp—un hende indefenso.

Esei ta un portrèt di loke Edòm a hasi ku Juda. Na un okashon den historia di Juda, ora Jerusalèm a wòrdu konkistá dor di nan enemigunan, na lugá di tene kompashon òf yuda nan "rumannan" (achteprimunan), e edomitanan a a demonstra krueldat pasívo; nan a para wak djaleo (1:11). Nan a hari i gosa Juda su sufrimentu (1:12). E edomitanan a plùnder loke e enemigunan no a plùnder kaba (1:13). Nan a mata òf kaptura esnan ku a logra skapa (1:14). E aktitut di e edomitanan ta deskribí den Salmo 137:7: "Kòrda, O SEÑOR, kiko e yunan di Edòm a hasi riba e dia di Jerusalèm; kon nan a bisa: "Bash'é abou, bash'é abou, te na su fundeshi.""

Dios a instruí Israel "No aboresé un edomita, pasobra ta bo ruman e ta..." (Deuteronomio 23:7). Ma Edòm a odia e pueblo di Dios. Nan a paga bon ku malu pa ku e pueblo di Dios.

Dios a kastigá Edòm tantu pa nan krueldat pasivo komo nan krueldat aktivo! Nan no solamente a gosa ora otronan a kometé aktonan di violensia kontra e habitantenan di Juda. E edomitanan mes a kometé aktonan violente kontra nan.

III. RESTORASHON DI ESUN KASTIGÁ PA EDOM - 1:15-21

E buki ta klousurá ku un promésa di Dios Su bendishon pa Juda...esun ku Edòm a odia asina tantu! Nan lo haña nan erensia (1:17). Pueblo di Dios lo ta e vlam, mientras Edòm lo ta yerba (1:18). Nan lo poseé e teritorio di Edòm (1:19-21).

VII. LÈSNAN FOR DI E BUKI

A. DIOS TA HUZGA PIKÁ

Dios a primintí den buki di Abdias ku E lo kastigá Edòm pa su piká: "Manera bo a hasi, lo wòrdu hasi ku bo" (1:15). Edòm lo ta "ruina...sakeá...kòrtá kitá afó pa semper" (1:5,6,10). Dios no ta hasi wega ku piká. *Dios lo huzga piká!* I Dios a huzga e piká di Edòm! Babilonia a umiyá nan. E nabatenonan a ekspulsá nan di Seru Seir. Den e di tres síglo despues di Kristo, Origen a bisa ku e pueblo i idioma di e edomitanan a desparesé kompletamente... likidá!

Interesante ta ku si e profesianan aki a wòrdu duná entre 840 i 825 B.C., Dios a tarda 600-

850 aña pa kumpli ku nan! Ta importante pa kòrda ku tin ora Dios ta tarda pa kumpli ku Su huisio kontra piká. Ma Su tardansa no ke men ku El a lubidá òf a kambia di opinion. *E lo bin sigur sigur!* 2 Pedro 3:9 ta bisa, “Señor no ta tarda ku Su promesa manera algun tin esaki pa tardansa, ma E tin pasenshi pa ku boso, i no kier pa ningun hende bai pèrdí, ma pa tur bin na repentimentu.” I ora Dios Su huisio ta bin, e lo ta un huisio *total!* Edòm su likidashon ta un echu históriko! I kualke persona òf nashon ku violá Palabra pa Dios por ta sigur ku nan lo haña Dios Su huisio!

Ma Dios Su huzgamentu di piká ta hustu! Abdias a deklará (den talbes por ta konsiderá e versíkulo klave di e buki), “Manera bo a hasi, lo wòrdu hasí ku bo” (1:15). Apòstel Pablo a bis’è di un otro forma: “...loke un hende sembra, esaki tambe e lo kosechá” (Galationan 6:7-8).

Hopi bes hende ta hunga ku piká. Nan ta kere ku nan lo no wòrdu kima. Ma tarde òf tempran nan lo sufri e konsekuensianan di nan piká! Un werphout (boomerang na ingles) ta un palu ku bo por tira den laira i e bin bek na bo. Si esun ku ta tir’è no ta kuidadoso, e werphout por herid’è. Piká ta meskos. Bo no por hunga ku piká sin wòrdu heridá bo mes! *Dios ta huzga piká sigur!*

B. DIOS LO NO TOLERÁ ORGUYO

Edòm tabata riku. Petra tabata situá riba un kamina prinsipal di karavana. Pa motibu di nan prosperidat i materialismo, nan a bira arogante, orguyoso, konfiando den nan mes! Nan a ignorá Dios, keriendo ku nan no tin mester di djE!

Palabra di Dios no ta prohibí rikesa. Ma E ta avisá nos ku plaka por ta kos peligroso, pasobra fásilmente bo por stim’è! “Ma esnan ku kier bira riku ta kai den tentashon i den trampa i den hopi deseonan loko i dañino, kualnan ta hundi hende den ruina i destrukshon. Pasobra amor pa plaka ta raís di tur sorto di maldat, i algun hende, dor di deseá esaki, a desviá for di e fe, i a trasasá nan mes ku hopi doló” (1Timoteo 6:9-10). Plaka por guia na materialismo. Materialismo por guia na orguyo. I orguyo por guia na e aktitut, “Mi’n tin mester di Dios”...asta entre hende ku supuestamente ta siguidó di Kristo!

C. BLACHI NO TA KAI LEU DI PALU

Esau a laga odio kushi den su kurason. E no tabatin lugá pa Dios den Su bida. Su desendientenan a sali meskos—bidanan sin Dios i yen di odio!

Tantu biaha piká di mayornan ta reflehá den e yunan! Nos ekspreshon, “Blachi no ta kai leu di palu” ta aplikabel den e kaso aki. Tantu biaha yunan ta sali ku e mesun tersio i aktitutnan ku nan mayornan i asta welonan a demonstrá. Mayornan mester siña un lès importante for di Esau i su desendientenan, e edomitanan.

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 306-310.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 136-144.
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 112-113.
- Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 95.
- Heicksen, M.H., Tenney, Merrill, ed. "Petra", *Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 4, p. 740.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 377-382.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 419-426.
- McGee, J. Vernon, *Thru the Bible* notes, p. 275-277.
- Mears, Henrietta C., *What the Bible is All About* (Minneapolis: World Wide Publications, 1966), p. 297-300.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 165-166.
- Wiersbe, Warren W., *Expository Outlines on the Old Testament*, (Convington, Kentucky: Calvary Baptist Church, March 1973).